

名

山

藏

名山藏卷之三十四

臣何喬遠恭輯

開聖記二

玄皇后

恒皇后

裕皇后

淳皇后

獻皇后

玄皇后德祖后也姓胡高帝元年正月乙亥追尊玄
皇后

恒皇后懿祖后也姓侯元年正月乙亥追尊恒皇后
裕皇后熙祖后也姓王元年正月乙亥追尊裕皇后
淳皇后仁祖后也姓陳始娠太祖時夢一道士脩髯

簪冠紅服象簡撥白丸置淳后手命嚥之忽不見元
年正月乙亥追尊淳皇后

獻皇后姓蔣都城蔣敷女弘治五年冊爲興王妃事
王恭順相納忠言日誦詩書嘗製女訓十二篇其辭
曰人子事親訓在孝經人臣事君訓在忠經婦之事
夫可無訓哉漢曹大家女誠人病其簡略所以發豐
生之難有所謂女憲女則徒有其名耳近世始有女
教之書大要撮曲禮內則之言周召二南之旨文理
奧妙婦人女子恐未能通吾自選入內庭榮配睿主
上受太皇太后暨皇太后皇太妃睿母之教服膺懿

德厥後隨侍之國內政多豫爰采古人教旨爲女訓
十二篇雖不足追配忠孝二經聊比女師之言閨訓
第一夫女坤也生則設悅門右明其女也三日臥之
牀下明卑弱也七歲不與男子同席十歲閨門不出
習柔順恭聽從麻任績養蠶治絲組紉繡纓供衣服
也潔明酒漿親執籩豆理菹菜具肉醢供祭祀也內
言不出外言不入晝動待姆夜行待燭見男子必擁
面見父母必致敬口不失嘯手不妄指此皆繇女師
之教而成安靜柔嘉之德也脩德第二爲婦者上事
宗廟下繼後世不爲不重也身不脩無以成德德不

養無以立身貞靜幽閒端莊誠一以成德也居正行
端以修身也德者身主身者家本養德而後爲貞女
修身而後能配君子是故性欲孝敬仁明情欲慈和
柔順居以柔和動繇禮義美璞無瑕可謂至寶貞女
純德可配京室五綵盛服不足爲華貞順率道乃可
爲德受命第三女十坤道也在家從父母真鴈之際
父母親授之夫戒曰必敬必戒無違夫子孝敬舅姑
和睦族黨莊以持身慈以待下儉以處家豐以待賓
有妾必愛有子必教以敬奉祭以誠待人女子慎多
言婦道戒嫉妬違父母之教是謂不孝夫婦第四夫

婦之道初合二姓之好中篤采徵之誠上事宗廟下
繼後世合體同尊卑故聖王重之也夫乾也婦坤也
婦從人夫御婦夫婦氣和如鼓瑟琴明可以隆家道
幽可以格鬼神孝舅姑第五女子未嫁孝父母既嫁
孝舅姑舅姑父母一也鷄初鳴盥漱整妝佩其服用
以適舅姑之所下氣怡聲問衣煥寒坐敬侍立行敬
扶持痒痲疾痛則敬抑搔毋敢怠命毋敢專事毋敢
私財敬甘旨之奉謹服用之度樂其心順其志婦職
也舅姑有大事居喪以禮或夫征役遠行竭力致養
舅姑逝世致力葬之則婦孝盡矣敬夫第六夫乾婦

坤乾天坤地以地承入敬事其夫堯女不以虞舜賤而不敬桓女不以鮑宣貧而不畏事有巨細不稟不敢行財無多寡不命不敢用有過則微言婉諫有疾則嘗藥跪進毋敢反目晨鳴端莊誠一以事君子上可以奉祭祀孝舅姑下可以繼子孫而資賢於後代也愛妾第七妾者接也接見君子者也嗣續寡息并曰乏操夫則求妾妻不揣已念家乃如卜納不知妾亦人子妾之有子固卽我子夫愛其妾我亦愛之妾受我愛必躬勤致敬謙卑自牧以事主母而侍左右充門和氣不禎祥乎慈下第八人有親疎恩有殊等

常訓戒之曰晨昏勤慎執事有恪勿言上人非勿論
上人事勿爲訕爭悖逆致不康寧旣不姑息煦愛爲
慈德矣詳其寒煖察其饑飽有疾給之湯藥力疲憊
以安逸故甘瓠繫於樛木庶草繁於深澤也妊子第
九古者婦人妊子寢不側坐不偏立不跛行不邪目
不亂視耳不淫聽口無傲言心無雜慮誦周召二南
之詩道仁義禮智之故故生子形容端正才貌過人
繇靈臺皎潔清明在躬也是故柔順貞靜溫良莊敬
樂乎和平無乖戾也存乎寬洪無忌嫉也殷乎仁慈
無殘害也執禮秉彝無縱越也祇率先訓無愆違也

若此者不惟以正其身也亦所以衛身而祐其子教
子第十子能食飯教以右手能言教以速應六歲教
以數方名七歲教以別男女八歲教入小學十五歲
教入大學古之道也縱其奢侈徇其驕傲衣服過華
麗飲食極甘美奢侈敗家驕傲亡身矣華麗溺志甘
美踰分矣太任胎教故有文王孟母遷教故有陬軻
凡生子者有諸母之賢者可擇爲子師無諸母之賢
者可勉爲子教也不特教男女亦可焉慎靜第十一
婦德莫大乎端已端已莫重乎慎靜動舉如對舅姑
閨房如臨傅姆富貴懼驕盈貧賤懼放失念慮有常

動靜無乖良婦之靜德貞女之慎行也節儉第十二
古者后妃補衮絺絺無斃非四海不足以供儉足寶
也天地生物自有限量人所以助天何況婦人安坐
閨閣無男子四方之役敢費物用樽節愛養母或奢
華以上化下以內表外不特人化其德神明佑之必
有其壽焉興王薨妃居邸一年武宗崩世宗入爲皇
帝既卽位三日遣人奉迎安陸使主者議推尊禮禮
官既請上考孝宗則稱興獻王皇叔父興獻大王妃
皇叔母議三上不允羣臣皆力爭惟進士張璁謂當
尊王爲皇考妃爲皇太后上遂面召大學士楊廷和

蔣冕毛紀等授手勅文華殿擬推尊如璵言廷和等
不奉詔會母妃將至禮部尚書毛澄請先遣文武大
臣各一人逆于通其禮至之日母妃繇崇文門入東
安門上迎于東華門上不許已請繇正陽左門進大
明承天端門午門之東王門入宮上又不許崇文門
者京師東門也正陽門者京師正門也御道在中間
王門諸王所出入門也上曰聖母至從御道入朝廟
羣臣譁謂母妃無謁廟禮已禮官治駕復具王妃車
上曰駕太后服太后服已母妃至通聞羣臣議曰我
子也安得子他人止不入者旬日上涕泣曰何以天

下爲請避皇帝位張太后固止之乃內降稱紀興獻
后興獻后乃入如皇太后儀謁奉先奉慈於大內不
廟見頃之上欲稱興獻后曰興獻皇后羣臣曰皇疑
后則皆爭大學士楊廷和至乞罷去上竟以嘉靖元
年尊后爲興國太后而未嫌也後三年加上尊號曰
本生母章聖皇太后而張璉桂萼等益與羣臣辨謂
上宜考興獻帝稱后爲母去本生乃成禮上竟用璉
萼等言以其秋尊后爲聖母章聖皇太后而張太后
稱伯母五年獻皇帝世廟成上奉太后入謁九年以
太后所著女訓與高皇后傳文皇后內訓頒布天下

令翰林官撮詩書關內教者撰爲詩言誦詠之宮中
而後四布中外以興天下之內教十五年四郊廟享
禮成上尊號曰章聖慈仁康靜貞壽皇太后十七年
建慈寧宮奉居之十二月太后崩越三日上勅禮工
一部曰慈駕遐升事莫重山陵朕惟皇考陵遠在承
天遐升之日尚諸侯王朕皦皦冲歲知識何有山陵
淺薄堂隧狹隘實貽多悔每一念至惕然怛傷比者
三歲春秋展禮山陵朕周覽川原得大峪山於長陵
西南林岡衍鬱實爲吉丘茲欲起逆梓宮遷祔於此
朕不敢專卜告皇祖皇帝旣得吉占二三勳輔咸贊

朕謀其吉聞祖宗列聖南奏皇考合葬慈靈列於諸陵之次朕心愜焉初張璠桂萼等以議禮驟稱上意天下竊見聖衷遠慕有陟岵之懷且謂上卽位十餘年未有太子一時罷民散吏胥動浮言具論顯陵壤不利宜改遷天壽山下以感動帝心上命禮部集議尚書夏言極言其不可上不聽至是文武大臣無敢言者皆曰宜如制乃遣駙馬都尉京山侯崔元爲奉迎使兵部尚書張瓚爲護行使太監鮑忠爲奉侍內官招揮趙俊爲起吉凶儀仗官起逆獻皇帝梓宮承天將以明年葬越七日車駕詣大峪山相視作穴處

上哀思太后擗踊號慟感動從官既歸御史陳讓奏
曰日者上天降割聖母弗延伏見陛下仁孝悽惻擗
踊號慟天地爲哀臣民若喪陛下遂定大禮擬合葬
睿宗皇帝于天壽山大峪之陽遂駕素車乘金相水
穴土印木臣以言官得隨扈從伏見車駕凌風衝露
陟岡履石皇皇如有求而弗得無非求厝慈親一席
之安而已斯時斯際皇天后土亦効精靈以啓陛下
大孝之思况於臣子夫大峪山必建睿宗皇帝之陵
以葬聖母論分則以配祖宗七陵之尊論情則以印
慈闈同穴之盟前事則可共祖宗以爲敬後事則可

依壽陵以爲安至矣盡矣臣特不忍遂虛獻廟已安之宅敢獻蕪蕘兩端以備採擇萬一陛下御極十有七年矣百姓謳歌華夷寧謐是雖聖德神功上帝歆佑之錫然臣嘗得諸傳聞皆謂獻廟幽宮龍穴極美且以皇考積德敦仁下襲水土玉質爲精地復爲母臣意其中生氣元功網緼會結必有紫茜點血玉液垂珠之祥故祐啓陛下以協在宥坤后山靈之庇不可誣也禮曰葬者藏也欲人不得見也今出聖考玉魄於母孕之地如取之於其胎也雖梓槨重封錦囊百襲能無疑哉古人事死之禮先廟後墳重魂後魄

是以黃帝成道登天羣臣葬其衣冠橋陵舜死蒼梧之野葬九疑之山蓋二妃未之從也臣妄謂陛下可奉睿宗皇帝遺衣納之梓宮飾以袞冕與皇太后合葬大峪碑題睿宗獻皇帝陵再以皇太后之遺冠帔納之梓宮奉以合葬顯陵碑題睿宗獻皇帝陵此臣之一見也若陛下必遷顯陵以遂孝思則顯陵之在承天者當爲二聖衣冠几杖之藏以當荆襄旺氣此臣又一見也竊取黃帝衣冠之藏之義兼取大舜九疑獨葬之禮以神爲配兩美具存睿宗章聖精神之在天者旣以神而會魄玉魄之在地者又以魄而留

神北陵以配七陵之重也而近又以慰陛下霜露之
思南陵以叙一方之勝也而遠又以留陛下龍潛之
迹在陛下擇之耳奏人上怒曰腐儒黜爲編民旣而
思曰獻皇帝體魄藏顯陵者二十歲矣以道途之遙
遠風塵之蒙露大不寧於朕心亦不寧我皇考皇妣
茲決意奉慈宮南朕將詣視焉多於北來爲孝者禮
部尚書嵩言靈駕北來慈宮南詣共一舉耳顯陵遠
在江漢陛下春秋念之遷於大峪則朝發而夕至也
可以密省謁展聖懷臣謂如初議便上曰孰是四海
非王土與卽如孝陵南矣昔我成祖豈容不思皇祖

也乃僅南孝陵因止崔元等三使毋行第使趙俊往
啓視之丙寅上尊諡曰慈孝貞順仁敬誠一安天誕
聖獻皇后是時上以送終大事念之數旬終難自決
二三輔弼親信之臣亦靡然影響莫能贊上意其明
年元日之夜上重復思惟復趣三命使南如前旨已
又思宜及葬曰安可優游不斷如婦女子耶朕意決
矣第昔日建造規模多所未稱宜朕自行觀閱其山
川於是卽拜顧璘爲工部侍郎董陵事議南幸諸大
臣皆諫上曰朕豈空行哉爲吾母耳已而御史劉賢
都給事中曾埏工部郎中岳倫等亦以爲言上怒奪

賢埏等俸罷倫職不叙太學生陳良鼎上疏上下錦
衣責問之二月車駕發京師文武大臣送駕宣武門
外上思慕太后製述懷之詩三月庚辰謁皇考于承
天隆慶殿辛巳登陵山周覽久之乃於舊玄宮之北
定新宮立表焉曰待合葬也因御行殿享上帝修扶
祀朝諸侯發德音以撫遺老勅大賚以振罷民車駕
將還京則又思維遲疑曰獻帝妥靈純德山有年矣
烏可它移徙大峪山之陽皇祖皇帝亦有重卜宜莫
若各營其處毋反葬於楚至慶都監察御史謝少南
言慶都有堯母墓佚於祀典皇上再圖鳳寢跋履山

川累思重慮聖人之孝也則帝堯之爲其母可知已
今者乘輿遠臨千載一會伊耆氏有靈不以表母之
墓望陛下乎乞下有司建廟或如古帝王陵寢故事
三年一祭則陛下至孝達于古初上嘉之如其言而
曰帝堯父母異陵可知合葬非古卽拜少南爲左春
坊左司直顧問大學士夏言昔日有諫止南祔者是
何御史何姓名今其疏安在於是還京仍命奉葬聖
母于大峪之山已復詣觀之則又見其山不如純德
山美乃決反葬之議使顧璘作新宮如前旨將遷獻
帝於舊宮以聖母往合葬焉以駙馬崔元爲奠獻便

載慈宮以登潞河之舟而命翊國公勛大學士言恭
送候進發奠獻諸臣各共其事甲申發引上衰服與
百官步送朝陽門外翊國公勛大學士言還報命詔
賜金帛酒饌曰慈舉南行禮物既備朕心稍寧無終
之慕則不能已一夕上夢大風撼梓宮舟既悟甚懼
卽詣禱玄冥於金海使使者馳送天妃經卷以壓舟
至采石磯磯不可泊太平府同知梅山鑿岡維舟以
濟及漢江之口沙澁忽雨浮漲焉上聞甚喜加梅山
爵一級七月庚申合葬于顯陵新宮辛酉舉愨祭永
孝殿辛未奉主祔獻皇帝廟上皆率皇后行禮曰以

名山錄 卷之三十四 二
此盡人子人婦之節上曰朕冲昧稔愆累及父母今
者送終禮畢思惟永慕轉覺不堪缺人子之情者無
如朕甚奉天勤民恐益迷昧尚賴左右承弼匡朕不
逮而論顧璘等功五十有一人賞有差

名山藏卷之三十五

臣何喬遠恭

繼體記

序名

洪武中東宮親王位下各擬二十字可名二十世子
生命名以五行相生一字爲偏傍以綴之其後宗室
繁多五行偏傍已窮皆翰林雜製定音而字義無取
焉懿文太子位下允文遵祖訓欽武大君勝順道宜
逢吉師良善用晨秦王位下尚志公誠秉惟懷敬誼
存輔嗣資廉直匡時永信惇晉王位下濟美鍾奇表
知新慎敏求審心咸景慕述學繼前修燕王位下今

爲帝系高瞻祁見祐厚載翊常由慈和怡伯仲簡靖
迪先猷周王位下有子同安睦勤朝在肅恭紹倫敦
惠潤昭恪廣登庸楚王位下孟季均榮顯英華蘊盛
容宏才升博衍茂士立全功齊王位下賢能長可慶
睿智實堪宗養性期淵雅寅思復會通魯王位下肇
泰陽當健觀頤壽以弘振舉希兼達康莊遇本寧蜀
王位下悅友申賓讓承宣奉至平懋進深滋益端居
務穆清湘王位下久鎮開方岳揚威謹禮儀剛毅循
超卓權衡素自持代王位下遜仕成聰俊充廷鼎
彝傳貽連秀郁炳耀壯洪基肅王位下瞻祿貢眞躬

縉紳識烈忠曦暉躋富運凱諫處恒隆遼王位下貴
豪恩寵致憲術儼尊儒雲仍祺保合操翰麗龍輿慶
王位下秩遂寘合鼎倪伸帥倬奇适完因巨衍隲眷
發需毘寧王位下磐奠觀宸拱多謀統議中總添支
庶闢作哲向親衷岷王位下徽音膺彥譽定幹企禋
雍崇理原諮訪寬鎔喜賁從谷王位下賦質僖雄敞
叢興闡福昌篤諧恂懌豫擴霽昱禎祥韓王位下冲
範徵偕旭融謨朗璟遠亶韶愉顛慥令緒价蕃維濬
王位下佶幼詮勛胤恬程效迥理湜源諶哲暉圭璧
澈澄昂安王位下斐序斌延賞凝覃濬社襄恢嚴額

輯矩纘密廓程綱唐王位下瓊芝彌宇宙碩器聿琳
琚啓齡蒙頌體嘉曆協銘圖郢王位下偉聞參望奠
箴誨洎臯夔麒麟餘積兆奎穎曄璿璣伊王位下頤
勉諛訐典褒珂采鳳琛應疇頌胄選昆玉冠泉金靖
江王位下贊佐相規約經邦任履亨若依純一行遠
得襲芳名舊有潭王位下福昌忻保定嘉應必興隆
啓處詢從式尊聞汝貴中以國除祖訓不載靖江王
府不以五行爲拘

懿文太子

悼恭太子

哀冲太子

莊敬太子

憲懷太子

建文世子附

獻懷世子附

懿文太子標高帝嫡長子也帝初下姑孰名郡曰太平而太子生之報至高帝喜鑄其山曰到此山者不患無嗣稍長帝使宋濂傳之年十四帝卽位立爲皇太子以廷臣兼宮僚不如古人別置太子賓客以明父子一體君臣一心乃以左丞相善長兼太子少師右丞相達兼太子少傅中書平章錄軍國重事遇春兼太子少保其餘廷臣皆兼官有差作大本堂收插圖籍番直儒秀其中有政則太子與羣卿先決乃以上聞而諭之曰造君多睿承君多爽造邦之君身周

於艱周艱則思思則睿承業之君身生於安生安則
壅壅則爽惟仁不暴惟明不惑惟勞不佚惟斷不牽
惟怠用爽小子勗哉帝威嚴神武極教盡刑太子慈
仁愍勤慨然思寬通平易之政帝嘗錄囚命御史袁
凱送太子覆審太子遞減之帝問凱朕與太子孰是
凱頓首曰陛下欲殺法之正也太子遞減心之慈也
袁凱字景文其先蜀人占籍華亭元末爲府椽以詩
名吳中長身古貌言議英發尤善詩篇彷彿杜甫

宋濂之孫慎坐通胡惟庸帝命卽家誅濂太子泣曰
臣顛慙無他傳惟陛下裁哀矜濂死帝怒曰待爾爲
天子而矜之太子懼溺於汪闋出焉帝爲太子赦濂

而喜且怒曰痴兒予殺人何與汝也因令出太子濡衣履者擢三級解衣者皆坐帝微時嘗被追高皇后掖帝逃高后薨太子哭泣圖懷之一日帝大刑人太子諫帝默然良久翌日遺杖地上命太子持太子有難色上曰爾尚難持其復能琢治今所誅除皆天下險人奸徒琢治燕爾福莫大焉余懼爾之弗能持也太子頓首曰臣聞堯舜之世不離自疏不鏤自完臣願陛下存其樸也上怒投之以杙不中太子走逐之圖墮上發視慟而罷久之使視陝可都否太子圖陝歸報仍使吏部尚書詹徽佐太子錄囚太子減如前

徽輒重附而先入奏至太子奏帝帝曰徽所執是法也太子又頓首臣聞立國之道仁厚爲本法者附也非所以附帝怒曰孺子欲遂君耶而教我太子坐病悸薨洪武二十五年四月丙子也戊寅臣民入哭慰上亦哭曰朕老矣太子亡祔葬太子鍾山東諡曰懿文立世子允炆爲太孫太孫卽位追尊孝康皇帝廟號興宗永樂中仍稱懿文太子始高帝將卽位之歲夢如微時遊舍南仰見西北羣鳥如燕摩天而下其數莫量須臾少近突出一鶴徐翅東南忽不知在惟有青旛浮空數行少頃天上有一木爲朱臺稜角四

周欄檻皆繫朱黃繩臺忽轉西以左南向見列坐僕頭抹額者數人又臺旋北向以後向南見中立三尊其中尊美貌修髯人世罕見畧少回顧帝仍往西北有頃逢數道士以真人絳衣授帝其衣裏五綵帝服衣忽然冠履俱備傍有道士授帝劔靴劔皆如牙齒帝轉行東南途逢皁衣者來禿袖露首及兩肱股首頂兩耳竈怒目西北往帝再東南行過一小川川南山北有房東西約十餘閒見懿文太子青衣而立占者曰燕者燕也其數莫量燕軍士也鶴者燕之王突出燕王出也美貌修髯燕王相也燕王蓋微時所生

西北竟都燕也東南南都也衣禿袖露首若肱股失
所歸也竈者釜也釜者父也頂一竈建文承太子也
怒目西北往憤也懿太子青衣立川南川北房失其
祀陵廢爲園也

悼恭太子祐極憲宗第二子也母曰柏賢妃成化七
年十一月己酉冊立踰月薨三歲耳

哀冲太子載堯肅皇帝長子也母曰閻麗嬪上卽位
十二年始得之旣越月當名諭禮部尚書夏言曰皇
子命名有敕諭故事也夫尚不省賜之敕虛文矣朕
欲待其知事乃教識之又禮曰父命名朕欲先告祖

者焉夏言言臣讀內則篇姆先相曰母某敢用時日
祇見孺子夫對曰欽有帥父執子右手咳而名之妻
對日記有成此夫婦對語非命子詞陛下曰不降敕
甚善請擬定告廟命名制以備一代典禮上曰是其
儀上先日告太廟寢殿其日保姆抱皇子於寢宮擇
內夫人敬慎者使剪髮留角上皮弁御乾清宮皇后
率麗嬪具服見行四拜禮畢皇后侍立東面麗嬪後
保姆抱皇子出寢西至殿內授后內贊奏曰皇后率
麗嬪閻氏敢用吉日祇見皇子上降座命制詞遂執
皇子之右手而賜之名皇后敬對畢左還授皇子于

保姆皇后率麗嬪再四拜次日上御奉天門以皇子
名敕禮部宗人府籍玉牒上如言議越月皇子薨敕
曰朕荷天眷予丈夫子雖卽云亡然嘗告之皇天皇
祖詔示中外將冊命之矣重傷聖母之心深切朕懷
之悼其諡之曰哀冲太子

莊敬太子載壑肅皇帝第二子也以嘉靖十五年生
母曰玉昭嬪娠時嬪夢神人星冠羽衣予之嬰兒遂
生太子既三日上祭告南郊及奉先崇先二殿遣祭
北郊諸壇南北郊皆加牛一頒詔朝鮮安南二國蓋
創禮也既四歲爲嘉靖十八年其春上將視顯陵立

爲皇太子使監國并封二子爲裕王三子爲景王同日受冊寶故事冊立皇太子於文華殿諸王奉天門東廊而已是歲禮官議禮擬二王同受冊於文華殿之中官誤送皇太子冊寶上宮中而裕王冊寶乃在太子所太子雖立幼未見羣臣也上自顯陵還疾良久其明年得方士段朝用將令太子監國而退行修攝之方諸大臣固爭太僕卿劉最以諫死其冬春坊贊善羅洪先司諫唐順之司經局較書趙時春請以明歲朝賀見太子於羣臣上怒曰朕久不朝病耳洪先等遂歸誠儲貳有必君父心其皆革職爲民其明

年御史楊爵上書極言朝政上復大怒吾其傳也爵
坐繫獄二十三年上又以久病欲傳位其冬禮部尚
書宋請上以獻歲御朝上復恚曰爾等謂吾病矣卽
此新序傳位太子於是羣臣莫敢請上朝者然太子
實弱不任年十四而冠冠二日薨太子生而靈靜不
悅紛華上方好神仙以其動有仙氣異之旣疾作忽
北面拜兒出矣其薨也上痛甚諭羣臣曰太子疾弱
生母保姆告我數矣比厚煖呂時中輩誹謗朕躬謂
朕不早朝又不教習太子朕受天明命承大道運豈
使小物欺笑又累太子年已十四或可出閣讀書故

先寇太子如故事豈期超凡長往嗟今失之矣紙上
唐誕之物能療之乎仰思當日聖母愛之甚至未久
捨我益彰朕不孝耳禮官議喪禮上及百官碁上謂
天子絕碁令百官齊衰哭臨冊諡曰莊敬工部尚書
顧可學言皇太子冠其日風壞泰圻坊二日逝泰與
太同未婚而死曰折爾雅曰方澤泰圻祭地也請易
折以圻不聽

憲懷太子翊鈇穆宗長子也五歲薨贈裕世子隆慶
元年追冊諡

建文景泰二太子附

建文君長子文奎以洪武二十九年十月晦生高帝不悅曰日月皆終建文君卽位立爲太子靖難兵至時年七歲不知其所終又有少子文森者建庶人也生二歲而建文失國幽中都廣安宮英宗復辟感南內事出之給歲奉與火者二十人
人十餘人聽其婚娶出入庶人二歲幽五十餘乃出出不辨牛馬竟卒懿文太子絕

懷獻皇太子見濟景帝長子也母曰杭妃景帝以邸王居攝已爲真旣三年懷獻八歲矣意欲立爲太子太上太子在不敢明言太監王誠舒良爲帝謀請

賜諸大臣金於是少保戶部尚書兼文淵閣大學士
陳循少保工部尚書兼東閣大學士高穀人賜金百
吏部左侍郎兼學士江洲禮部左侍郎兼學士王一
寧戶部右侍郎兼學士蕭鎡翰林學士商輅人賜金
五十然亦未敢發頃之廣西都指揮黃玠上疏言高
皇帝龍飛淮甸定鼎開基所期聖子神孫傳之無窮
胡寇犯邊太上輕屈萬乘被遮虜廷扈從羣臣天下
將士十喪八九逆虜乘勝長驅迫京畿邑幾殆非列
聖在天之靈預誕皇躬繼登大寶天下臣民何所歸
嚮此皇天所以眷陛下也陛下卽位已踰二年東宮

尚仍太上之舊豈念太后太上有所不忍臣惟太子天下本古人云天與不取反受其咎竊恐日月淹久議論妄生人心易搖爭奪興亂卽欲循前代遜讓之美復全天叙之倫勢有不可近者星逆行太微垣臣測天意殆有垂諭願蚤與親信大臣密議易建以一中外之心絕覬覦之望帝得疏喜甚下旨曰此宗社重事下多官會議之禮部尚書胡濙侍郎薩琦鄒幹會羣臣議衆知不可莫敢言太監興安厲聲曰事不可已不可者無署何遲疑耶陳循等先受金口盡塞循坐左足而署諸臣繼之皆言父有天下傳之子三

代享國長久皆用此道宜從珖言詔曰卿等所引皆古義近者耆舊內臣亦來勸導與卿奏同朕不敢專上請皇母皇太后太后曰但欲宗社乂安天下太平人心如此政當順之朕不敢違遂以五月甲午立懷獻爲皇太子廢汪后冊杭氏爲皇后改封太上皇帝皇太子爲沂王帝旣先賜羣臣金至是復多置東宮官屬諸臣皆兼東宮官支兩俸以慰悅其心黃珖者思明府土官知府珖庶兄也珖以嫡爲土官知府而珖以捍禦功爲都指揮珖有二子均庶而長鉢嫡而少珖老請鈞代鉢怨珖時方以都指揮守備潯州兵

威甚振欲殺鈞并奪鉢而襲之計授球聚兵五千夜馳入府襲殺珮支解鈞甕瘞之詐言盜入府明日鉢入城舉哀請珮爲捕盜珮卽發鉢罪若爲珮伸理者巡撫刑部侍郎李棠使參政曾翬副使劉仁宅往治珮陰持金多遺翬仁宅外挾兵勢相抗撓仁宅陽許之留翬于潯與約去至南寧珮二子逐仁宅伏甲縛之亦誘執珮于潯以歸以聞於朝詔械繫廣西獄珮懼乃請立儲以悅帝懷獻旣立帝赦珮進爲都督使人撫仁宅陷以他事而棠坐致仕始珮疏至時中朝皆曰珮遠夷何知必有受賂而基之者以疑江淵而

景帝下詔書天下吏部尚書何文淵爲被端語曰天
祐下民作之君父有天下傳之子常自喜而誦之太
上復辟王誠舒良皆伏誅陳循江淵發戍鐵嶺商輅
等廷杖除名爲民王直高穀皆致仕文淵以先致仕
虞禍咽金死而珖亦飲藥自盡上命發珖棺鞭其屍
珖子政皆誅始署議時諸臣盡唯唯惟王直與給事
中林聰頗有違心然竟不敢言及太子旣立復大賞
金直持金歸扣案頓足曰此何等大事出蠻夷口吾
輩不能諍媿死矣直歸年八十餘夫妻偕老相攜阡
陌閒課督耕種子孫更迭上壽天久雨門外江漲直

與老妻踰門望之曰當時有欲引吾入閣者西楊抑
吾今吾得志今有鐵嶺之行得踰門望漲耶成化初
修英廟實錄史館欲書江淵爲珖作疏史官丘濬曰
此殊易辨若出江公手則必用京師奏本紙若用廣
西土產紙者珖自爲疏也取視則廣西紙淵乃免於
物議懷獻太子以立之明年薨追諡英宗復辟稱世
子

名山藏卷之三十六

晉江何喬遠 撰

分藩記

宗室諸侯王之患厚則驕溢薄則困辱無計書鑿之前世如出一轍明興高皇帝以宋爲懲內域削弱邊圉弗威使胡人得逞中原而居閏位於是大封諸子連亘邊陲北平天險爲元故都以王燕東歷漁陽盧龍出喜峰包大寧控葆塞山戎以王寧東度渝關跨遼東西竝海被朝鮮聯開原交市東北諸夷以王遼西按古北口瀕於雍河中更上谷雲中鞏居庸蔽鴈

門以王谷若代鴈門之南太原其都會也表裏河山以王晉逾河而西歷延慶韋靈又逾河北保寧夏倚賀蘭以王慶兼殺隴之險周秦都圻之地牧坳之野直走金城以王秦西渡河領張掖酒泉諸郡西扃嘉峪護西域諸國以王肅此九王者皆塞王也莫不傳險陘控要害佐以元侯宿將權崇制命勢匹撫軍肅清沙漠壘帳相望其他周楚齊潭魯蜀諸王護衛精卒萬六千餘人牧馬數千疋亦皆部兵耀武並列內郡當其時承一帝爲諸子兄弟之國土地雖大名位雖崇無斧斤芒刃之憂高皇帝旣厭羣臣太孫御曆

二十二王者皆叔父行以意行國中自如齊黃進量
大夫之謀凌逼既深猜忤遂積文皇因燕成資奮戈
南向三載而易大物然而不以其故貶湯武何哉高
帝雖棄羣臣尚在陟降乃周王錮齊王逮湘王焚代
王囚岷王流一年之內諸王慄慄惴惴吹毛之求無
窮舐糠之憂已及不貶湯武不亦宜耶靖難以後諸
王不察文皇所以興師之故競生異心至煩撓枉鑿
覆慰諭璽書及於再四而齊谷之事又見焉凌夷以
及趙王若是者非直強弱勢殊固順逆之理異也嗣
是天子攬權結網收阿藏器諸王分封後不得再入

朝出其王城必請護衛不置亡繇臣一切吏民爲左
官者不得復任天子吏諸王衣租食稅比君有庳以
故八十餘年閒有園土之收未聞甸師之戮迨武宗
之末寘鑄狂狡卒起窮邊宸濠凶奸久窺神器皆不
逾旬朔身殞國除不亦宜與然而生齒日繁邸祿歲
窘尚爾浮繫一城仰口待哺於是裨王莫知南面之
愉支子更起齊民之慕雖大司馬九伐無所施功而
司農宗伯技殫筭絕乃有減歲祿限年封額媵妾婚
無力而不告子逾期而後請寃越關而自訟者一切
奪祿削封當事者至幸其觸禁犯網幾得省祿之利

若是者不亦持申韓之法以治堯舜之家哉今上二
十一年禮部尚書羅萬化請稍弛其禁亦用諸臣言
開科舉之路三十四年皇孫生復申明之然拘擥已
極奉行竟格夫君子之澤五世而斬天子之澤七世
以觀諸宗皆以袒免之殺尚爾耗費大農卽均予以
歲祿亦如豕圈獸檻集蠅嘍蛄愛而不教未有如此
甚者昔者棗陽王祐惲願棄祿應舉近時鄭世子載
堉請辭爵入山耻於抱才具無所得爲而自虛其世
也其他強者武斷恣睢弱者竊竊至盜賊博塞姦淫
夫人生天地間無四民仕宦之業坐食而不得自聊

羣臣百工猶徯憲章不敢破積格此真變窮通久時矣

高二十五子

懿文太子成祖而外凡二十三王

秦王

晉王

周王

楚王

齊王

潭王

趙王

魯王

秦愍王棧國西安高后生洪武三年封封九年之國
耿炳文爲王作宮王見宮瓦碧將殺之高帝聞召王
還至方食擢髮縮以箸予以紅杖紅捲一居久之王
市人浙江上責長史輔導奈何不諫悉誅之追念故
長史文原吉善輔王賞而賜之勅曰昔爾原吉輔王

政清民樂一旦致仕政頌民擾羣小儉邪導王爲非
奸宄忠良昭然可見使朕念爾不忘其所以賜原吉
白金二錠楮幣百文錦帛三十復召王還上春秋高
念塞甚責諸王備虜行邊二十七年王率平羌將軍
寗正克平西番於洮州明年薨冊諡曰朕封建諸子
爾以年長首秦期在永保祿位夫何不良竟殞厥身
嗚呼哀痛者父子至情追諡者天下公論朕何敢私
特諡爾愍王王二十六年年四十王妃以死殉諡愍
烈妃王保保妹也子尚炳立是爲隱王王和厚廉素
成祖初卽位使者至王國王屢不出迎詔不見使者

成祖械長史紀善典儀以下賜王書曰昔齊桓拜胙
遂以霸國晉侯情玉見譏無後王勉之禮其後來朝
而恭上悅賜從官長史以下有差王十八年薨子志
坦立是爲僖王王薨而能立稍長溫恭孝敬王十三
年薨亡後渭南王志均以庶兄進封是爲懷王王三
年薨亡後富平王志潔用懷王弟進封是爲康王王
好古強學章帝二年以護衛軍嵩等言其府中事奏
辭三護衛章帝褒之還予以一衛然亦數聽細人誣
奏鎮守都御史陳鎰陵辱官屬箠死軍尉王二十八
年薨子公錫立是爲惠王王好文睦族時時開閣張

宴招延士大夫以賢名諸藩王二十九年薨無適子
立庶長子鎮安王誠泳是爲簡王王哲德箴身比於
古人折節士大夫間郡王以下望而畏之都御史雍
泰罷居韋曲王出入溫泉時駕過之好爲詩詩以質
楊一清王十一年薨長史強晟哀王遺行載以美王
王亡後從弟臨潼王誠潔子秉機立是爲昭王追贈
其祖公銘爲安王父誠潔爲莊王昭王王二十年薨
庶子惟焯立是爲定王定王事祖母至孝每旦焚香
望闕爲天子祝壽世宗二十年太廟災上萬金助工
上益王祿歲石二百賜玉帶襲衣王三十六年薨亡

後以再從姪鎮國中尉懷捲嗣是爲宣王追贈其父奉國將軍惟嫌爲端王王善爲官詞世宗朝奏辭本祿千石以給蕃宗賜勅獎諭王十八年薨子敬鎔立是爲靖王王八年薨子誼澍立是爲敬王王十四年薨亡後弟紫陽王誼漈立萬曆二十三年薨

秦愍王六子

隱王

永興王尚烈母寧河王女太祖幼育之禁中愛之成祖初入朝過鳳陽筆楚畱守司官以下成祖居之肇昌使講學練武王薨子志堞立堞薨子公鈺立鈺薨

子誠瀾立瀾薨從姪秉樸絲奉國將軍冒封薨子惟
燿立萬曆中王以冒自舉王止其身有宗室

保安王尚煜與永興王同母王薨子志垵立垵薨子
公鍊立鍊薨子誠潢立潢薨亡後弟誠淥以鎮國將
軍進封亡後弟誠澈以鎮國將軍進封王事母孝薨
子秉棧立棧薨以先世襲冒止不嗣有宗室

興平王尚焞焞薨子志堞立堞薨子公鍊立亡子除
永壽王尚虹虹薨子志埴立埴薨子公錠立錠薨子
誠淋立淋薨子秉樞立樞爲詩壽劉瑾用泥金書瑾
誅籍得之武宗大怒李東陽楊廷和抅解罷王亡適

子有庶子八人鎮國將軍惟燿長先王卒有孫懷墉
王嬖內助邵生子惟熿妃沒王請邵爲妃王薨惟熿
求嗣懷墉爭曰其初則皆庶也乃長懷墉墉薨子敬
鏞立鏞薨子誼況立

庶人尚炆初封安定永樂十六年護衛百戶誠持王
募士檄告王反削爵安置泗宣德十年放歸守愍園
除

秦隱王四子

僖王未妃薨

懷王自渭南進王未妃薨

康王自富平進王

宜川王志琛琛薨子公銳立銳薨子誠灌立灌薨子秉櫟立亡子除有宗室

秦康王五子

惠王

公鍵卒亡後

臨潼王公銘銘薨子誠潔立潔薨子秉櫟立櫟進王
爲昭王郡爵除有宗室

郃陽王公鏗鏗薨子誠泓立亡子弟誠澮以鎮國將
軍進封澮薨子秉櫟立亡子除有宗室

汧陽王公錯錯薨子誠冽立王事父及繼母孝居喪如古禮追爲母服喪喪夫人不再娶其祥也萱草華雪中弘治十四年旌表薨子秉棖立亡子除有宗室秦惠王一子

簡王先封鎮安

秦昭王一子

定王

秦宣王一子

靖王以隆德王進封郡爵除有宗室

秦靖王三子

敬王亡子

鎮國將軍誼浚

王誼漉以紫陽王封

臣爲郎時秦自王而下凡三千三十有二宗

晉恭王櫛國太原高后生年十三封封七年之國王
之國中道撻膳夫高帝示之勅曰聞爾中道撻膳夫
吾甚恐吾氣雄志壯率羣英平禍亂犯者無輕重不
姑息姑息獨徐興祖爲吾膳夫二十三年矣未嘗輕
折辱吾以保吾命小子識哉王脩目美髯顧盼有威
多智數嘗裂人於奔馬坐廢得懿文太子調護其始

以杜彥良爲相王爲彥良造安車其後又以侍御史

龍舒人汪河爲相

汪河龍舒人少有大志調儻傑出從太祖渡江爲行省椽屢陳時務

太祖高其謀識擢大都督府都事出入左右元察罕帖木兒克復汴梁兵威甚振上命河使察罕結援謀論稱旨察罕子擴廓帖木兒遣使來通好上遣河與俱往河至擴廓拘留之洪武九年王師下河洛擴廓懼始還河河被拘凡六年抗厲不屈上嘉重之卽陞爲吏部侍郎河備陳虜中事上方畧擴廓竟錄是敗二年陞御史臺侍御史陞陳謙論補益甚多九年上封晉王于太原簡河爲傅河在王所以賢稱

洪

武二十六年命王總宋國公勝兵出塞捕虜代王率

護衛軍從而亦命燕王出塞自以其護衛軍燕王深

入虜王不及還第築城於下水帝責王不能王二十

八年薨諡恭子濟熹立爲定王成祖初以王縱下黜

其長史龍潭別選之晉王懼欲上護衛不許曰皇祖
賜也初王弟濟熿戾恭王弗愛王卽位濟熿追憾王
不解於恭王數使人誣王不軌王與世子美圭坐廢
幽恭園而濟熿王濟熿旣王鳩殺其嫡母逼烝恭王
侍兒裁絕王飲食王困恭園十年恭王故府中媼不
能平訴之成祖以故承奉徵爲證徵者濟熿嘗誣其
佐王爲逆久械繫京師獄成祖出徵問之得其狀卽
使徵召王徵馳入空室中解王糾纏相持哭時府中
傳言徵繫死久矣及至皆大驚王入見憊甚成祖憫
之封美圭平陽王使奉王居平陽予之故連伯灘田

濟熿怨成祖崩弗服也使寺人代縗臨幕中仁宗卽位念嘗與王同學勅濟熿善遇之與王故王寇厚賜之加給之歲米濟熿益怨望仁宗崩亦不服喪漢反詞連濟熿濟熿恐益陰治輿械發屯儲應漢廣致妖巫書章帝祿命魘呪之府中人言濟熿者數十輩濟熿恐請辭王召免爲庶人幽之高牆誅所與同謀妖巫官屬悉械繫論死奉祠成敬坐謫戍自頌寃章帝

下之腐刑

成敬永樂中以進士選庶吉士改晉府奉祠既下腐刑得爲內官監侍景帝甚見親

敬不措懼不乞恩澤子凱登進士初第卽病且死景帝諭敬曰爾子平時志何官敬泣對曰凱願出人禁闕大馬自効奈薄福何上嘆息授凱吏科都給事中

聞命遂卒凱俊才善詩賦涇陽人御史李錦見凱作

輔弼藏之有
而東爲舉人

而晉國久廢英宗卽位乃立美圭爲王
是爲憲王王和厚易直恭事朝廷久愈篤王十年薨
庶長子鍾鉉立是爲莊王莊王仁厚恭謹日致拜于
天地宗廟博古善法書摹絳帖而廣之表於朝孝宗
賜書嘉歎王王六十一年世子奇源及其子表榮皆
弗及王表榮子知焯立是爲端王追封奇源爲靖王
表榮爲懷王奇源好學有至性母妃病徒步禱神及
薨乞廬墓孝宗止之端王孤七歲耳而能知哀居母
喪嘔血三年芝生其寢宮王好儒斥佛老王三十一
年薨亡子以靖王次子表棟之孫新煥爲王是爲簡

王追封表榘爲安王父知慟爲康王王母太妃尚氏
教王嚴時跽王床下尚疾王叩頭露禱請醫與均禮
左相朋數陳善王輒下拜王以時勞苦國中吏士賜
予加自奉王無內道時樂酒與寺人作嬰兒戲自解
其老也以弟新墻子慎鏡攝王薨慎鏡亦薨王凡立
三十九年弟慎錮以輔國將軍進封是爲惠王追封
慎鏡爲敬王惠王立一年薨子敏淳立敏淳請於朝
追封新墻爲和王立二十六年薨今王求桂立求桂
有賢聲

晉恭王七子

定王

高平王濟燁亡子除

庶人濟燁先封聞喜後封平陽以通漢廢正統中絕慶成王濟炫始生之日高帝方御慶成之宴喜曰長封王以號國故他王率繫地而王獨號慶成王成祖時王數以圖書擅給驛馬被譙讓成祖令諸王子練武他州縣王得潞州護衛軍人玉等爲強盜王不以聞遣捕曲芑之坐召還王薨子美靖立令其總旗誘妓與之姦奏陞旺爲典仗有欲告者王假他事杖死之二小旗爲盜王隱焉而姦其妻爲人所告靖薨子

鍾鎰立王妃妾可二十人四十四子百六十三孫五百十有曾孫當王之身子孫百人多不能相識王自喜世宗朝圖上家慶世宗不悅曰不費吾祿米哉王薨子奇瀆立孝宗初王以長子代父理府事筮死亡辜七人孝宗冠王諸生寇使讀書久之乃以孝聞年八十餘薨子表樂立王訥好禮年亦八十餘子知燦立燦薨子新堤先王卒長孫慎鍾立

寧化王濟煥正統己巳之變欲率其子六人從軍以報國煥薨子美壤立壤薨子鍾鈔立炳姬其父妾多通姦衛軍妻不從輒殺之死者八人孝宗冠王書生

冠革其歲祿于兇淫益甚九年幽高牆卒子奇隱未
王卒子表操立操薨子知燼立燼薨子新肇立薨
永和王濟娘娘有內使誠自宮不淨與王宮人通王
夫人杖死所通宮人誠以他事請王毆死夫人及其
母後有欲發其事者王輒杖死以滅口千戶爲王治
私宅居王所姦妓妓生女琪求以其子爲儀賓爲守
墳軍所告誠坐斬娘薨子美塢立美塢烝庶母亂其
妹致軍舍人八人入宮同姦其宮人翠兒致死勒其
妃與所愛者通妃絕之其所烝庶母生一子詭爲宮
人所有請名於朝事聞英宗召美塢京師覆得實誅

軍人八人削美塢爲庶人留之京師子鍾鍊立鍊薨
子奇清立清薨子表栒立栒薨子知燁立燁薨子新
堽立堽薨今王慎鐻立

廣昌王濟焞焞薨子美堅立堅薨亡子除有宗室

晉定王八子

憲王

交城王美琬王妃悍妬數箠死宮人母妃居定墳以
避之以不孝賜自盡而王亦自與平陽知府轅相惡
誣奏之上爲治其儀賓瑛罪王薨子鍾鍊立鍊薨子
奇涓立涓薨亡子弟奇瀟子表杻立杻亡子從弟表

相立以孽除有宗室

陽曲王美兆堯子鍾鏡立成化中以罪除有宗室
西河王美堉堯子鍾鏐立鏐堯子奇溯立王三歲
而孤而能孝母病渴祝天甘泉湧渴愈堯子表相立
亦能孝堯今王知燧立

方山王美垣堯子鍾鋌立老無子以所產女與其
外家易男革爵除封正德中奪其諡有宗室

臨泉王美塔堯子鍾鏐立鏐堯子奇渾立渾子表
杓未王卒杓子知燧立亡子除有宗室

雲丘王美堉堯子鍾鋌立鋌堯子奇渲立渲堯子

表樟立亡子除有宗室

寧河王美瑠王所居府成化十七年有妖爲祟夜或爲神像或爲王侯舉火將焚宮至次年冬宮果焚寇服器用皆蕩盡憲宗所以賜王良厚瑠薨子鍾鏤立鏤薨子奇云立云薨子表楠立孝且仁國人稱之薨子知芻立

晉憲王四子

莊王先封榆社後爲王

徐溝王鍾鐸絕除

河東王鍾鏞鏞薨子奇淮立淮嘗學能文氣和色溫

道德仁義談吐充然薨子表枋未王卒枋子知炯立
炯薨子新墳立王富而儉約而有禮薨子慎鑣立長
子敏愔

太谷王鍾鏹絕除

晉莊王四子

追封靖王世子奇源

義寧王奇漢漢薨子表櫬立櫬薨子知赫立赫薨子
新端立端薨子慎鏢立鏢薨今王敏渾立

河中王奇溶溶薨子表梓立梓薨子知炬立炬薨子
新塗先卒今王慎鑣立

襄陰王奇溥溥薨子表榘立絕除有宗室

晉靖王六子

追封懷王世孫表榮

安王表榘以鎮國將軍進封封新化王追封王爵者之子故不得封爲郡王正德中劉瑾擅政竟予封後以孫簡王追諡安子知熾又以子簡王追諡康康王秉禮樂善有著述例除有宗室

安溪王表榘以鎮國將軍封亡子除

靖安王表秩以鎮國將軍封有道氣能詩薨子知熾立婚薨今王新環立三世俱能詩子慎鍛其宗王傳

生也

旌德王表指以鎮國將軍封薨子知燉立絕除有宗室

榮澤王表椽薨子知燿立亡子除

晉懷王二子

鎮國將軍知燦夭

端王亡子

晉惠王一子

今王

臣爲郎時晉自王而下凡二千有五宗

周定王橐高皇后生初封吳國錢塘高帝以吳爲賦
數改封周國開封府於宋故宮王之國高后遺慈母
從賜所御袍若杖一日王有過披袍植杖坐責之如
我在也王好學能詞賦工書從上所賜元嫗得聞元
宮中事製元宮詞百章時人以比之三輔黃圖書又
以國土夷曠庶草蕃蕪辨察其可佐饑饉者種植四
百餘種繪而疏之名採荒本草請得周是修爲其府
奉祠是脩病數問之及愈爲是脩加一餐久之來居
鳳陽高帝謂王擅離國謫雲南尋復之建文初齊泰
黃子澄獻翦燕之謀以王燕母弟易取取周卽翦燕

王亦自爲備相王翰諫王不納翰斷指佯狂去

王翰平時

舉夏臺人元季隱居中條山至明始出爲周王相王

有異志翰正諫弗納度不可爲卽斷指佯狂去去王

叛言屬皆就理翰竟無所坐復起爲翰林編脩濟康州教授值夷獠作亂城陷翰抗節死

會有告

王反者建文帝陰使曹國公備兵於邊假道園王宮

執王竄蒙化別安置其諸子已復召還錮之靖難師

入金川王與齊王搏見拜且哭成祖竝王按轡登樓

相勞也永樂元年復王封如故二年進頌九章及佾

舞其年騶虞見鈞王朝以獻上宴賜甚厚旣還馳賜

以外夷貢珍若羊百牽酒千瓶久之復有告王反者

使都御史王彰馳按獻還三護衛上悅王闕東書堂

分藩記

以教世子辟長史劉淳爲之師王端禮門之槐枯數

幹淳陳咎於王王自脩省幹復榮王名其槐爲摠忠

之槐

劉淳祥符人元季寓洛陽不求聞達博物洽聞操行峻介洪武中以薦爲原武教諭亟謝去茅

屋土垣杜門掃軌旣爲長史復辭歸邑子來學庭舍至不能容

王五十六年薨子有

燉立是爲憲王王博學善書爲世子時嘗有東書堂

帖行世所製樂府新聲大梁人歌舞之王十四年薨

亡子臨沒乞喪葬於近地葬從儉妃夫人以下母從

死年少有父母者遣歸家王薨妃鞏氏以死殉夫人

施氏歐氏陳氏韓氏張氏李氏亦同死英宗賜諡厚

葬之弟有燿自祥符王封是爲簡王王十四年薨子

子屋立是爲靖王王二年薨亡子弟子陞以通許王
立是爲懿王王二十九年薨子同鑣立是爲惠王王
十二年薨子安瀆先王卒孫睦櫛立是爲恭王王追封
安瀆爲悼王王三十八年薨子勤熄先王卒孫朝炯
立是爲莊王王追封勤熄爲康王王十二年薨子在烜
立是爲敬王王三十二年薨今王肅濬立長子恭枵
周定王十五子

憲王母馮氏宋國公勝女

庶人有嬭初封汝南故善漢庶人定王見告反有嬭
爲之靖難後得白乞誅有嬭成祖赦居之大理定王

老始歸歸與其弟有熇不睦於祥符王欲誣祥符王
及詐爲王報趙反書竟覺免庶人守陵神烈山除是
爲宣德三年

順陽王有烜亡子除

簡王故封祥符

庶人有熇封新安昏人腦肝膽常以日昡拚人殺而
鮎之新安之門無行人竟坐與有爨謀構祥符削王
守陵神烈山除

永寧王有允允薨子子場立場薨子同鈺立鈺薨子
安法立法薨子睦燃立燃薨子勤燭立燭薨子朝暉

立塉薨今王在鏗立

汝陽王有煽煽薨子子堅立聖薨子同銍立銍薨子
安波立瀆薨子睦謹立謹薨子勤葵立葵薨子朝墜
立墜亡子除有宗室

鎮平王有擴德善多材工詩歌書畫及于騎射毬毬
作道統論歷代賢王傳以壽終子子堦立堦薨子同
鑿立鑿薨子安洙立洙薨亡出除有宗室

宜陽王有焮亡子除

遂平王有頰頰薨子子堦立堦薨子同鏐立鏐薨子
安洛立王言論英發臨事有斷以壽終子睦檠弗及

王子勤儉祠朴而貧薨子朝墀孫在欽弗及嗣今王
肅渾立

封立王有煜煜薨子子墀立王隆準虬髯其聲如鐘
薨子同銘立其髯類父英雄有材畧好夜宴竟薨子
安湜立湜薨子睦立端儉多賑捨薨子勤羔立亡
子除有宗室

羅山王有燠燠薨亡子妃殉諡貞烈除

內鄉王有焯子子垓先王卒王薨孫同銀立銀薨子
安湜立崇儉省奢薨子睦撮立薨今王勤焯立長子

朝繼

胙成王有燔燔薨子子墟立墟薨子同鑿立鑿薨子
安瀏立瀏薨子睦梳立梳薨子勤燔立燔薨今王朝
塋立

第十五子殤贈固始王

周簡王十二子

靖王亡子

懿王故封通許

原武王子嬭嬭薨子同鍛立鍛薨子安淇立淇薨子
睦櫛立櫛薨子勤煇立煇薨長子朝埜長孫在郕

鄆陵王子堅堅薨子同鉞立鉞薨子安沅立沅薨子

陸桓立栒堯長子勤炆長孫朝墀

河陰王子壘堯妃殉諡貞烈子同鏞立鏞堯子安
坵立坵堯子陸橘立橘堯今王勤炆立長子朝焜

項城王子堰亡子除

宜陽王子姚亡子除

潁川王子墟堯子同鑪立鑪堯子安潛不及封孫
陸棟立堯長子勤樸卒

義陽王子圪堯子同鏢立鏢堯子安波立波堯今
王陸樸立

子敬封未冊卒亡子

汝陰王子僚亡子除

臨汝王子博博薨子同銜立銜薨今王安沛立長子
睦隄

周懿王八子

惠王封睢陽進世子竟王

沈丘王同鏐鏐薨子安涪立涪薨子睦栲立栲薨子
勤焜立焜薨今王朝苟立

上洛王同錄錄薨子安瀼立瀼薨子睦榼立榼薨今
王勤譏立長子朝瞞

魯陽王同銳銳薨子安禾立禾薨子睦祉不及封今

王勤灰立長子朝拱

臨湍王同鈞鈞薨子安澆立澆薨子睦繁立繁薨子勤綏立王無適子有濫妾子朝聖不得封降奉國將軍除有宗室

堵陽王同鈇鈇薨子安驛孫睦檯不及封曾孫勤焮立焮薨今王朝壻立

清河王同鏞王嘗挾姬夜遊巡甲止王王使姬截甲耳孝宗降勅切責王薨子安沈立亡子弟鎮國將軍安洄子睦稜立稜薨今王勤燦立竟以冒伯父封例除有宗室

新會王同鏘鏘薨子安渤立渤薨子睦樞立睦樞文而恣睦樞以學舉爲宗正樞妬之誣其以獻女得譏以詭曲使府中習誦之萬曆初上以宗室多無所出祿遣給事中萬象春行議諸王府限制贍貧宗睦樞嘆曰是齊秦黃子澄復出聚宗室千餘人盟誓周府門出飛章造睦樞羣擊之盡其鬚髮曰皆爾謀而羣上書抗詔坐廢幽高牆除有宗室

周惠王二十三子

世子安潢追封悼王

義寧王安浹惠王無嫡子立庶長子安潢爲世子安

潢薨恭王立而幼安洙誣恭王母出不正不可嗣冀
得自爲王弘治三年坐革爵正德初復王薨子睦樺
立樺薨子勤襲立長子朝璉不及封今王在鎰立
庶人安泛封平樂惠王世子其庶長子安潢安泛與
安洙以次受封惠王安靜不事事安潢專權嗜利與
安洙安泛等競置囹圄刑具集亡賴爲私人擊斷無
諱而安泛爲甚惠王戒安潢不從王怒安泛因而傾
安潢奏請廢之安潢亦持安泛不法事欲上告惠王
薨羣小惡安泛於安潢安潢奏安泛私壞宗廟社稷
儀仗桀作諸壇庫姦庶母毆死人安泛亦誣奏世子

以膳毒惠王通惠王妾服中作戲下鎮巡官案驗會
赦頃之安瀆死安泛侵陵安瀆妃殊甚孝宗十三年
命太監魏忠刑部侍郎何鑑往案安泛恐益持世子
毒殺惠王事并誣安瀆妃淫亂所連逮千餘人鑑等
還奏上削安泛爵降爲庶人幽高牆除其封

崇善王安涪涪薨子睦榑立榑薨子勤熅弗及封孫
朝墉亦天除有宗室

鎮國將軍安逢追封海陽王子睦杲立薨今王勤炆
立長子朝陞

安沈未封卒

名山集 卷之三十三
安泮未封卒

定安王安湏亡子除

曲江王安濛濛薨子睦捨立捨薨今王勤燿立

鎮國將軍安溘未王卒

博平王安洩惠王男子二十餘平樂義寧諸王交閱
皆以及難獨王備車馬盛賓客客莫不造門教授蕭
雅勸王讀書王曰善日從雅讀書也雅年八十餘且
卒王爲治後事其卒也使人視殯殮三日王親臨奠
焉周自定憲以來率諱死凡喪葬事無敢王聞者死
則曰老曰乾王獨親臨奠教授人謂王修義慕有

終始王薨子睦柯立柯薨子勤煥立煥薨朝基立長子在鉤

鎮國將軍安洙未王卒

聊城王安澮亡子除

汾西王安澮澮薨子睦栲立栲薨子勤燾立燾薨子朝垺立亡子除有宗室

魯山王安濼濼薨子睦權立權薨子勤煥立亡子除有宗室

信陵王安泮泮薨子睦榘立榘薨子勤煥立亡子除有宗室

邵陵王安潤潤薨子睦梓立梓薨子勤燦封鎮國將軍

萊陽王安湏湏薨子睦枕立枕薨子勤煥立煥薨長子朝驤

東會王安瀉瀉薨子睦柝立子勤亮先王卒孫朝堡立

富陽王安濯濯薨子睦桴立桴薨子勤煜立萬曆元年革爲庶人除有宗室

會稽王安蒨蒨薨子睦杉立杉薨子勤遜立遜薨子朝難

鄧
浦江王安涇涇薨子睦栢立栢薨子勤煥立長子朝

麗水王安汾亡子除

周悼王九子

恭王

鎮國將軍睦栢未王卒

鎮國將軍睦棟未王卒

應城王睦桎擢謙下士以忠孝旌薨子勤燦立燦薨
子朝均立均薨子在錠立

益陽王睦楮楮薨子勤煜不及王孫朝潭立

名山藏

卷之三十一

三

奉新王睦樞樞覺子勤斌立子朝埏

庶子睦謙

庶子睦恂

南陵王睦樸博學該物廉介節儉無聲色之好所居瓦屋不綠嘉靖季上書請立宗學以崇德教設選科以省祿費嚴保勘以杜冒濫革冗職以除素餐戒奔競以息饕餮許拜掃以廣孝思立憂制以省祿費上嘉納之竟老亡子除

周恭王十四子

世子勤熄追封康王

京山王勤炫子朝璧先卒王薨王在鉢立長子肅沛
華亭王勤焮焮薨今王朝垣立長子在銚
寶坻王勤炬炬薨今王朝培立長孫在鈴
湯溪王勤焜焜薨今王朝型立長子在釜
瑞金王勤煥煥薨子朝塚立塚薨今王在鈞立
商城王勤斌斌薨子朝塙立塙薨長子在鈇
勤烱未封卒

勤焮封臨安天亡子除

柘城王勤燧燧薨今王朝堦立長子在鐸
脩武王勤燧燧薨今王朝棚立

安吉王勤爍爍薨今王朝堤立

汝寧王勤熒王病腫幾殆妾劉焚香祝天衣單三冬以分王災王愈王薨劉氏自經從隆慶中賜旌表勤焯封彰德長子朝堪

周康王四子

莊王

朝埴封順慶

保寧王朝堵堵薨子在鍛立

朝墀未封卒

周莊王四子

敬王

儀封王在變變薨子肅濫立

在鉞封安昌萬曆中以孝義旌

在鈺封遂寧子肅鴻

周敬王二子

今王一闕

今王四子

恭枵餘未名

臣郎曰臣爲郎時周自王以下凡三萬二千八百九十七宗其宗獨衆而人貧甚嘉靖中有代宗室越關

訴糧者言臣從開封來目擊周宗動作有禁無產可
驚無人可依數日之中會不一食有年踰三十不能
婚者有暴露十餘年不能葬者有行乞市井傭作民
閒流移它鄉餓死道路者諸府宗室誠貧於周爲甚
上覽而憫焉

楚昭王楨國武昌母昭敬太充妃胡氏生時高帝破
漢武昌報至帝喜問羣臣武昌古何地也對曰楚上
日子長予楚及分封王齊鑄齊寶三鑄三虧帝乃記
之曰昔予心許楚乃封楚高帝賜王經史王錄御註
洪範及大寶箴于座右時觀警十四年命率江夏侯

德興討散毛諸洞蠻夷明年討大庸諸洞蠻夷銅鼓
五開蠻爲亂出沒不常聞王師至輒竄匿退則復出
十八年命王與信國和討之王與信國公分屯諸洞
立柵與雜耕以狎之久之計擒其渠魁餘黨悉潰二
十年討雲南阿魯禿道走武關至鄜州擒之二十四
年往征西番二十七年道州杜回子叛承命討平之
是年復討全州叛徭二十八年討桂陽山寇平之二
十九年盧溪黔陽諸洞蠻夷叛王出師自沅州伐山
踰阻至天桂山深入苗寨平之三十年熒惑入太微
高帝以太微楚分勅王戒慎玉書十事以無忘大訓

其十事曰尊朝廷守祖訓敬神明作藩屏順人心友
兄弟防邊境練軍士謹錢穀畜馬乘玉每討平諸叛
高帝喜謂王有略及子巴陵王薨帝予勅曰劉向云
人君候五星出入所舍何分進退休咎務必知之是
以自古有土有衆者謹身心觀天道察人情不敢自
暇逸分茅胙土之君亦自有一國休咎可不審與吾
諭爾久矣前與爾天文書一帙望爾知星象慮禍福
脩人事也舊歲熒惑入太微太微天庭居翼軫楚分
也五星無故入災必甚焉徑入東往猶不爲害今順
入逆出八十日矣在內庭十日有死君者有死后者

死宰相者况八十日爾子疾逝災非止此爾尚省慎以回天意其冬王妃薨蓋高帝之精天文如此是年古州蠻叛使王與湘王柏率師十萬往征王不親蒞軍措糧糗無方上心乃謂王不武也王居國樂善奉法無有險越成祖卽位召爲宗正八年入朝上美王賢亦與其官屬能輔導褒賜之王五十五年薨子孟烷立是爲莊王章帝時平江伯瑄密奏湖廣東南大藩襟帶湖湘控引蠻越交廣黔蜀之會人民蕃庶商賈輻聚楚立國三護衛自始封至今齒繁積充兵強國富魁於異藩護衛之官交姻連婭孽枝延蔓小人

行險或生其心惟陛下借乏餉名選其健銳使轉漕京師因而畱之章帝曰楚故無過不可莊王懼請內兩護衛自畱其一帝勞而聽之令王自選其一而後歸兩衛於朝王小心敬慎敏而好學所招引管時敏貝駟雷貫等皆文學之士王十六年薨子李况自武陵王立是爲憲王王事母妃鄧至孝鄧疾幾殆王籲大願代躬侍湯藥不解帶者幾月英宗賜書獎諭母妃鄧鄧愈孫女也王亦以文稱所著東平河間圖贊士林誦之王四年亡子薨弟季淑自黔陽王進封是爲康王正德初疏論逾瑾罪王五十九年薨亡子以

莊王庶子東安王子均鉞嗣是爲靖王王四十六年
薨子榮滅立是爲端王王仁且孝徒跣送葬武宗表
之彰孝之坊王二十三年薨子顯榕自長樂王立是
爲愍王王居端王喪遇生辰卻羣臣之賀儀賓寶者
靖王壻也與其弟貢多營利王踈之宗室訟寶王弗
庇也而収其賜田寶怒使貢誣奏王幸臣玉海與其
府中人呼王萬歲誘王演武設水戲習水軍書上肅
帝下都御史御史治都御史御史具言王居喪却賀
能知禮不坐削寶爲編民然王亦時有不法事初王
娶於吳生英耀収宮人王生英煥英耀長封爲世子

見王宮人方兒悅之私烝之外舍王知之禁方兒北園咎其狎人陶元死之居亡何王與諸王泛湖登湖臺娼么兒侍英耀又悅之通之於湖亭明日英耀具筐通中使其卒金與卒良輔筐么兒致之館王怒甚發聲死二卒二卒懼如元也告英耀曰王怒世子之位不可知矣英耀曰然不如我先會元夕世子與二卒謀置酒享王烝之以力士王至世子匿力士堂後曰砲可舉也酒數進犒從人王從人下受犒英耀示力士砲力士出以銅瓜槌王王瞿然曰耀耀腦出死耀取銅鞭鞭王屍迎么兒爲新妃處端王之宮遷端

主事聞逮英耀夜斬之焚其屍諡王曰愍楚人稱
王爲破頭王肅帝二十四年也於是英燿嗣是爲
恭王王謙抑名於楚王二十一年薨今王華奎立
楚昭王十子

巴陵王孟煜亡子除

永安王孟炯炯薨子季塾立塾薨子均錄不及封孫
榮澹立澹薨子顯梧立梧薨子英峻立峻薨子華沫
立沫薨今王蘊鍾立

莊王有二兄皆庶也故莊王王

壽昌王孟焯焯薨子季圻立圻薨子均鐵立亡子除

名山錄
卷之三十一
一
三
有宗室

崇陽王孟煒煒子季堞立堞堞子均釵立釵堞子
榮灑不及封孫顯休嗣王王及奉國將軍榮潛鎮國
中尉顯樸顯藁爲愍王主宗祿出息以惡金及祿權
子母償精金取盈焉宗人皆怨鎮國將軍顯樸與其
舍人虎言之朝格之愍王怒笞顯樸斃虎罰顯樸于
金月旦顯樸將朝于愍王王與榮潛顯藁顯樸袖鍔
尺權鎚待之號郭羣斃之王竟賜死潛藁樸幽高牆
降襲鎮國將軍

通山王孟煥有賢聲煥堞子季垺立垺堞子均鍊不

及封孫榮澆嗣澆薨子顯耦立耦薨子英炊立愍王之及也世子逼脅諸王諸王皆爲世子閉惡唯王直奏聞王薨長子華垠先卒孫蘊鉉立長子盛漢

通城王孟燦有賢聲燦薨子季塏立塏薨子均錫先卒孫榮渡立渡薨子顯柜先卒孫英烱立烱薨今王華峙立長子蘊錄

景陵王孟炤亡子除

岳陽王孟燿燿薨子季境立亡子除有宗室

江夏王孟炬炬薨子季壑立壑薨子均鉅立鉅薨子榮漢立漢薨子顯桔立桔薨子英煨立爲今王長子

華煊

楚莊王四子

憲王

康王

東安王季燾燾薨子均鉗進嗣楚王次子均鈺立鈺
薨子榮淑立淑薨子顯椀立老成忠厚薨子英燧立
爲今王

大治王季煥亡子除

楚靖王二子

端王

縉雲王榮淋亡子除

楚端王三子

愍王

保康王顯樟

武崗王顯槐英耀之弒也王奔抹愍王縱傷臂事聞
賜白金三斤彩幣玄黃四襲嘉靖末請立宗學以教
諸宗高下其月餼爲升黜廷臣多採用之然爲人陰
毒亡人理嘗被逮長子英燿

楚愍王二子

逆凶英耀

名山藏

卷之三十一

分藩記

三

恭王

楚恭王二子

今王

宣化王華璧與今王一乳生母胡氏

臣爲郎時楚自王而下凡二千一百三十有一宗

齊庶人樽母達定妃高帝三年用皇子封爲齊王國
青州王以武自雄數以上命練兵於邊爲恣肆建文
初府中人曾名深告變建文帝徵王廢爲庶人與周
王橐同繫護衛指揮真等皆伏誅靖難師入金川使
兵護二王二王卒不知所以伏地哭已知爲靖難兵

乃大喜成祖與王齊如故封王子賢炆爲樂安王賢
峻爲長山王賢寔爲平原王王之國無能改前過益
陰養刺客奸人築王苑竝城使其護衛守城人不得
登城夜巡王朝帝曰戒之戒之母記伏地哭時耶王
益自疑謗毀呪禳私僭號闇結勇士通邊夷上不忍
賜之諭書王亦上表悔過因請朝謝旣至羣臣交劾
王厲聲曰奸臣喋喋又欲效建文時耶會盡斬此
輩上聞不憚削其護衛官屬畱居京師吏部尚書蹇
義請罪其教授垣等上曰齊王凶悖出天性朕拔王
危難安全之誠心溫詞尚不得其聽况肯遜于下置

不問久之益怨言上乃遍諭齊過於諸王王與其子俱削爲庶人除封幽王西內宣宗三年福建建陽男子樓濂詭稱齊王子謀舉事令覺之捕誅其黨數百人梟及其子賢挺等皆暴卒今獨其少子賢赫有後以庶宗居南京

潭王梓國長沙母達定妃洪武三年用皇子封二歲耳十八年之國王慧而文數設醴召府僚賦詩品高下金繒賞之治亭殿東掖置琴酒書研洪武二十三年妃與民家坐事上召王王驚闔宮焚死在位二十一年無子除亦聞曰達定妃故陳友諒姬上妃之妃

居常爲語所以爲妃故王不勝忿閉城反竟自焚
趙王杞高帝大封諸子秦晉燕吳楚五王皆任衣冠
齊潭趙魯在襁褓王封二歲耳明年殤

魯荒王檀國兗州母郭寧妃封時生兩月耳年十五
之國在位二十年薨王好文禮士而餌丹以至眇竟
薨高帝戾之所以刪之如秦王子肇輝立爲靖王王
恭謹下士以奉法聞王六十四年薨子泰堪立爲惠
王王七年薨子陽鑄立爲莊王王四十八年薨子當
縱孫健杙不及王曾孫觀旋立爲端王追封當縱懷
王健杙悼王端王爲王幼狎其典膳信等淫戲亡度

名山類
卷之三十六
一
言
爲複屋曲房於東園離宮挾娼樂飲裸男女雜浴左
右有忤立斃之或炮烙刑信等咄啐殺人有抉眼截
唇死者世宗念王幼革其祿三之二逮信等誅之王
二十年薨子頤坦自寶慶王立爲今王王事端王病
嘗藥請代喪葬遵禮衰經三年捐田及湖數頃以賑
貧民世宗獎之世子壽鎬先王卒

魯荒王一子

靖王

魯靖王六子

惠王

鉅野王泰澄澄堯子陽荃立事繼母孝堯子當涵立
涵堯子健樗立樗堯子觀燁立燁堯子後除有宗室
鄒平王泰滕堯子陽鏞立鏞堯子當湜立湜堯子
健檔不及嗣其子觀熾立湜檔皆以孝聞熾堯今王
頤在

安丘王泰圻圻堯子陽鑿不及封孫當遂立遂堯子
健樸立樸堯子觀嫌立嫌堯今王頤堀立長子壽鏗
樂陵王泰學學堯子陽館立館有三子曰當河曰當
淙曰當汭館延秀才滕滋教之河汭鈍淙敏滋告王
王屬心淙河汭恨杖殺滋竝降爲庶人以淙嗣館堯

潦不及封孫健概立概薨子觀燔立燔薨子頤垓立
垓薨子壽鎬

東阿王泰壘壘薨長子陽鐔卒亡子弟陽鏢以鎮國
將軍進封孝友能詩善楷書薨子當澆立薨亡子除
有宗室

魯惠王一子

莊王

魯莊王十子

懷簡世子當澁以孫端王追封懷王

東甌王當泚泚薨子健楸立楸老亡子言宗室所以

蕃絲其詐以妾媵子爲嫡子臣今六十亡息胤所受
府第屯厰請以身後盡歸魯府待給新封省民財萬
一乞著爲例報可王薨爵除有宗室

郟城王當滋亡子除

館陶王當忽兇淫亡子除

翼城王當濡濡薨今王健櫛立長子觀燿

滋陽王當漬漬薨子健櫛不及嗣孫觀燿立燿薨長

子頤峴先卒今王壽鎮立

陽信王當潛潛薨子健杜立杜薨子觀燃立燃薨子

頤埔立埔薨今王壽鈔立

高密王當涓涓薨子健棻立棻薨子觀煥立煥薨子
頤封立亡子除有宗室

庶人當返故封歸善正德中流賊攻兗庶人借護衛
盜甲弓弩率家衆乘城射却之朝廷降勅褒諭遂以
健武聞庶人數數召袁質射與其舍人趙巖縱酒莊
王有較尉智庶人愛之屬長史魁啓莊王以爲家人
魁不應密請莊王重繩之莊王謫智爲樂工庶人怒
欲縛辱魁魁匿不見乘醉言莊王庶人欲反王質者
東平人居鄉侮斷鄉人惡之吏部主事梁穀者亦東
平人其微時克戾倚諸惡少年旣貴惡少年尚往來

其門厭苦之穀又與千戶高乾有怨其邑人西鳳
竹入京師造穀言糾衆且爲逆穀意動訪於屈
昂昂亦亡賴子書愈誑穀同邑劉昇者嘗爲千戶
王鑽所辱會亦自東平來復誣鑽預謀於穀穀因告
變於楊一清言質巖且通當沔反攝乾等與其所厭
苦惡少年爲從內廷權貴聞之欲徵封拜如眞鏞故
事遂密聞於武宗兵部尚書陸完請下山東密捕令
總兵官劉暉以遼東軍駐濟寧伺變魁因奏莊王不
發禍且先內廷權貴亦示意迫莊王莊王懼遂亦奏
當沔反有旨遣司禮太監祥大理少卿鈍錦衣衛指

揮端往執之益發兵布置德州大名淮徐間京師洵
洵旬日震動既至圍庶人宮庶人方醉卧與質等束
手就縛曰我何罪索其兵器則向射賊弓弩也巡按
御史翰臣劾奏穀報怨邀功長史魁譖子感父竝宜
寘法詔以翰臣爲謀叛者隱匿下錦衣獄降爲州判
官御史啓充等極論穀鼓煽流言啓小人生事喜功
之心致大臣輕信寡謀之失死不足盡法豈宜與翰
臣異罰不報於是下廷臣議當沔罪無所坐獨以乖
違祖訓降爲庶人幽高牆質及宗屬戍肅州鳳竹昂
徙口外魁亦妄誣坐斬餘所連逮多瘐死者中官

護送當汭之高牆當汭猶未知所坐中官曰當之鳳陽謂祖陵耳比至問曰何地也曰高牆乃大慟曰寃乎觸牆死聞者傷之子健柶立亡子除

新蔡王當汭汭薨子健柶立柶薨今王觀燧立長子頤掛

魯懷王一子

世子健柶以子端王追封悼

魯悼王一子

端王

魯端王二子

今王以寶慶王進封

今東原王頤埜

今王八子

溫肅世子壽鑄

福安王壽鈇天亡子除

富平王壽鎰

常德王壽鉞今爲魯王

寧德王壽鉞

泰興王壽鏞

長泰王壽鎔